

Političke stranke razmatraju reforme Vijeća ministara

Viši zamjenik visokog predstavnika, Gerhard Enver Schrömbgens, danas popodne se u Sarajevu sastao sa liderima i predstavnicima stranaka koje su ušle u Zastupnički dom BiH nakon oktobarskih izbora, u cilju razmatranja reformi koje će pospješiti rad Vijeća ministara BiH.

U svom postizbornom obraćanju ekonomskoj zajednici i međunarodnim investitorima, primjetivši da su mane sadašnjeg sistema recept za nestabilnost, neefikasnost i zbrku, visoki predstavnik je pozvao političke lidere BiH da razmotre načine reformiranja sadašnjeg Vijeća ministara. Izmjene u samom srcu vlasti su neophodne ako BiH želi da se oslobodi nepotrebne birokracije i provede istinsku reformu. Visoki predstavnik je reformu Vijeća ministara uključio u šest testova ozbiljnosti novoizabranih stranaka. On je rekao da će način njihovog odgovora na ova pitanja biti lakmus test njihove opredjeljenosti za reformu.

Na današnjem sastanku, viši zamjenik visokog predstavnika je utvrdio nekoliko područja u kojima je potrebno provesti reformu, uključujući i ukidanje principa rotacije, povećanje odgovornosti predsjedavajućeg, smanjenje broja zamjenika ministara, reorganiziranje samih ministarstava i reformiranje strukture državne službe u cilju poboljšanja planiranja politike i pružanja ministrima više pomoći. Viši zamjenik je naglasio da se zastupljenost tri konstitutivna naroda u BiH treba zadržati i stoga tražio da stranke ponovo razmotre ovo pitanje u svjetlu ovih reformi. Međutim, prioritet mora biti na efikasnosti i na uklanjanju nepotrebne birokracije. Viši zamjenik je podvukao potrebu za urgentnošću – ovaj proces bi trebao biti okončan prije imenovanja novog Vijeća ministara.

Iz razgovora vođenih između višeg zamjenika i stranačkih lidera

u toku protekla dva mjeseca postalo je jasno da postoji široka podrška za reformu Vijeća ministara. Viši zamjenik Schrömbgens je na početku sastanka pozdravio činjenicu da su mnogi predstavnici stranaka već uputili konkretne prijedloge, naglasivši da su "ove reforme od takvog značaja za BiH da bi u principu trebale dobiti podršku svih vodećih stranaka, bez obzira da li će ući u vlast ili će biti u opoziciji. Kao i u slučaju mnogih drugih pitanja, i ovo pitanje predstavlja test zrelosti svake od stranaka i njihove opredjeljenosti na reforme".

Visoki predstavnik je imenovao višeg zamjenika Schrömbgensa za predsjedavajućeg radnom grupom za reformu Vijeća ministara u oktobru. Viši zamjenik je od tada održao sastanke sa velikom većinom stranaka koje su ušle u Zastupnički dom BiH, kako bi ih podstakao na davanje sopstvenih ideja za ove suštinske reforme.